



Datë: 20.08.2025
Numër Protokolli: 5946/2025

A.nr.1140/2025

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, me Kaltrina Avdullahi Prenaj, në cilësinë e procesmbajtëses, në procedurë sipas ankesës me numër A.nr.1140/2025, të datës 13.06.2025, të parashtruar nga ankuesi J.K., kundër organit të punësimit: Ministria e Industrisë Ndërmarrësisë dhe Tregtisë, në çështjen juridike “kompensim material”, në mbështetje të nenit 6, paragrafin 1, nën paragrafin 1.1, nenit 16, paragrafi 3 dhe nenit 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 20.08.2025 mori këtë:

V E N D I M

Hedhet poshtë si e palejuar ankesa A.nr.1140/2025, e datës 13.06.2025, e parashtruar nga ankuesi J.K.

A r s y e t i m

Nëpunësi civil J.K.(referuar tutje vetëm ankuesi), më datë 13.06.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, lidhur me realizimin e të drejtës për kompensim si anëtar i Komisionit për Monitorimin e Realizimit të Projektit për Subvencionimin e Granteve për NVM, sipas Vendimin me numër protokolli 1-350/12 të datës 02.04.2024.

Këshilli i Pavarur Mbikëqyrës për Shërbimin Civil të Kosovës bazuar në Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, ka proceduar kërkesën për përgjigje në ankesë të ankuesit në Ministrinë e Industrisë, Ndërmarrësisë dhe Tregtisë, ndërsa, kjo e fundit, më datë 28.07.2025, ka përcjell përgjigjen në ankesë.

Kolegji i Këshillit duke u bazuar në vlerësimin e hollësishëm të çdo prove veç e veç dhe të gjitha provave të marra së bashku, si dhe bazuar në rezultatin tërësor të shqyrtimit administrativ, konstatoi se ankesa e ankuesit është e palejuar, sepse:

Nga administrimi i shkresave të lëndës, rrjedhë se ankuesi është i punësuar në Ministrinë e Industrisë, Ndërmarrësisë dhe Tregtisë dhe se i njëjti sipas Akt emërimit të datës 04.05.2020, ushtron pozitën e punës Zyrtar për Mbrojtjen e Konsumatorit, në Departamentin për Mbrojtjen e Konsumatorit.

Tutje, nga provat e lëndës, del se U.d i Drejtorit të Përgjithshëm në AIPNK me Vendimin me numër protokolli 1-350/12 të datës 02.04.2024, ka formuar Komisionin për Monitorimin e Realizimit të Projektit për Subvencionimin e Granteve për NVM, në përbërje prej katër (4) profesionistëve, në mesin e tyre edhe ankuesi i cili është caktuar si anëtar – rezervë, me renditje (2.4).

Ankuesi, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor se nuk i është bërë kompensimi sipas Vendimit me numër protokolli 1-350/12 të datës 02.04.2024, përmes të cilit ka qenë i emëruar si anëtar – rezervë në monitorimin e realizimit të projektit për subvencionimin e Granteve për NVM, me pretendimin ankimor se angazhimi ka tejkaluar afatin maksimal 1 vjeçar të përcaktuar sipas ligjit, tutje shton se detyrat e Komisionit përbejnë detyra shtesë që nuk janë të përfshira në përshkrimin e detyrave të punës. Kërkon nga Këshilli që të aprovoj ankesa dhe të detyrohet organi i punësimit që të aprovoj shtesën në pagë në masën 20% mbi bazën duke filluar nga data 10.08.2023 deri më 10.05.2024.

Kolegji për Shqyrtimin dhe Vendorsjen e Ankesave lidhur me pranueshmerinë e ankesës iu referua dispozitave të Ligjit Nr.08/L-197 për Zyratë Publikë, përkatësisht nenit 27 paragrafi 3 ku përcaktohet se: 3. Nëpunësi civil ka të drejtë të paraqes ankesë në Këshillin e Pavarur Mbikëqyrës të Shërbimit Civil të Kosovës për çdo veprim apo mosveprim, që i cenon të drejtat apo interesat e ligjshme, të drejta këto që burojnë nga marrëdhënia e punës në shërbimin civil, si dhe dispozitat e Ligjit Nr.05/L-031 për Procedurën e Përgjithshme Administrative, përkatësisht neni 124 ku përcaktohet se: 1. Pala ka të drejtë të ushtrojë mjetet juridike administrative ndaj çdo veprimi apo mosveprimi administrativ, nëse pretendon se të drejtat apo interesat e saj juridike cenohen nga ky veprim apo mosveprim, dhe si rrjedhojë referuar dispozitave përkatëse ligjore konstatoi se nëpunësi civil ka të drejtë të paraqes ankesë në Këshillin e Pavarur Mbikëqyrës për Shërbimin Civil të Kosovës, për çdo veprim apo mosveprim, që i cenon të drejtat apo interesat e ligjshme të cilat burojnë nga marrëdhënia e punës, mirëpo kur kemi të bëjmë me realizimin e të drejtave sikurse në rrethanat e rastit konkret, nëpunësi civil fillimisht duhet t'i drejtohet organit të punësimit me kërkesë për realizimin e të drejtës se pretenduar, dhe vetëm kundër aktit për refuzimin e kërkesës apo heshtjes se organit publikë në raport me kërkesën e parashtruar, mund të parashtroj ankesë sipas afateve të përcaktuara me dispozitat e nenit 127 të Ligjit Nr.05/L-031 për Procedurën e Përgjithshme Administrative.

Kolegji i Këshillit, bazuar në kuadrin përkatës ligjor si dhe nga shqyrtimi dhe analizimi i shkresave të lëndës të përcjella nga palët në procedurë ka konstatuar se ankuesi lidhur me objektin e ankesës gjegjësisht lidhur me të drejtën e tij për kompensim material nuk i është drejtuar paraprakisht me kërkesë organit të punësimit, veprim ky i domosdoshëm për inicimin e procedurës administrative sipas dispozitave të ligjit përkatës për Procedurën e Përgjithshme Administrative. Si rrjedhojë, në mungesë të kërkesës se parashtruar të organi i punësimit për realizimin e të drejtës se pretenduar, nga ankuesi, në rastin konkret nuk kemi objekt trajtimi ngase mungon veprimi apo mosveprim nga organi i punësimit në raport me të drejtën e pretenduar në ankesë, për çka ankuesi mund të kontestonte ligjshmërinë e veprimit të organit të punësimit, apo mosveprimin e tij.

Kështu që, për sa me sipër, Kolegji konstaton se në rrethanat e rastit konkret nuk janë plotësuar kushtet ligjore për pranueshmerinë e ankesës në kuptim të nenit 129 paragrafi 1 nën paragrafi 1.4 të Ligjit Nr.05/L-031 për Procedurën e Përgjithshme Administrative, dhe se duke u mbështetur në dispozitat e nenit 18 paragrafin 1 nën paragrafin 1.7 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi që të hedhë poshtë ankesën si të palejueshme, ashtu sikurse në dispozitiv të këtij vendimi.

Këshillë juridike: Vendimi hyn në fuqi në ditën e nënshkrimit nga Kryetarja e Kolegjit. Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda: A.nr.1140/2025

Kaltrina Avdullahi Prenaj

Procesmbajtës

Ardita Haxhnikaj DEMI

Kryetare e Kolegjit

Vendimi i dërgohet:

- Ankuesit, J.K;
- Udhëheqësit të Burimeve Njerëzore në Ministrinë e Industrisë, Ndërmarrësisë dhe Tregtisë;
- Arkivit të KPMSHCK-së